




# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

TESEMA 2015

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## KERISIMASI: Ma Fai Musika e To'alua mai Lonetona

E tele lava ina tatou matua le malamalama i nisi o mea e fai e le Atua mo tatou. E le fetau i o

tatou manatu. E pei o Isaac Watts ma George Frideric Handel. E le taumate e matua

mamao, mamao lava ma lou mafaufau sou filifilia o la'ua ia la te tusia le pese Kerisimasi e le taumate e aupito sili ona malie ma logoitino o loo iai ia tatou pese - le pese: **“Joy to the World”**, ma le pese: **Messiah.**,  
*faaaauau itulau e 2*



## Lotu Taeao i Falelauniu - Lotu Afiافي i Sogi/Fugalei

O se tala faaaauau o le atina'eina o le Ekalesia sa i Sogi. O se isi vaega o le aulotu sa i Sogi i tausaga ua mavae, ua lolotu nei i lo latou malumalu fou i Falelauniu. A o se isi vaega e fia nonofo pea i eleele na latou soifua mai ai i Sogi, ua faia le falesa mo latou i Fugalei, (silasila i le ata oi luga), i le fanua e toluquata eka i le auvai pito i uta

o le vai lea e tafe mai i le alalaupapa i Fugalei, e le mamao tele i uta ma le mea sa iai lo latou malumalu i Sogi. O ia aulotu e lua o loo tausaga e le Susuga i le Toeaina  
*faaaauau itulau e 8*

**Ia e Utu O'u Loimata i Lau Fagu**  
*silasila itulau e 5*

## O le Aso na Lanu Auro ai le Fetu Lanumoana

O aso o le Taua Tele Lonalua a le lalolagi - 1939-1945, na sauni ai Papa ma Mama e o i le lotu.

*faaaauau itulau e 8*

## Tātā le Vaiolini a Nero a o Mu Roma

E le taumate ua e faitau i le talatuu e faapea, sa tata le vaiolini a Nero le tupu o Roma, a o le la e sosolo le afi o mu ai Roma, lona laumua.  
*faaaauau itulau e 9*

## O le Pusa Penitala

O le la ou te nofonofo i lo'u ofisa ma ou mafaufau, ma sauni  
*faaaauau itulau e 12*

## O le Mafuaaga o le Pese:

## Great Is Thy Faithfulness

*silasila itulau e 13*

---

# KERISIMASI: Ma Fai Musika e To'alu mai Lonetona

Na tusia e Watts lana pese muamua a o le'i atoa le 20 o ona tausaga, e tetee ai i lona tama, o se faifeau. E le'i fiafia Isaac e pese i salamo ia ua silia i le selau tausaga o usuina i lotu, ona fai lea iai o lona tama, "A 'e le fia pese i pese ia, tago e tusi ni pese e sili atu ona lelei i lo pese ia." Faasaga atu loa Watts tusi.

O Watts, o se tama e tino laitiiti, e le aulelei, ma e na oo ina tia'i e le teine sa alofa iai. Na oo ina maua i ma'i i lona olaga atoa mulimuli ane, ma e le'i toe malosai mai ai. Na oo ina ia faanotaina Salamo uma oi le Tusi Paia. O le pese, "Joy to the World", o loo faavaeina i luga o le vaega mulimuli o le Salamo e 98.

O le musika poo le fati o le pese o ta'ua i luga, e sii mai i le pese lauiloa, "Messiah" na tusia e George Frideric Handel, o se tagata o le aai o Lonetona sa

soifua mai i le vai taimi o Isaac Watts. E pei o Watts, e le'i faaipoipo foi. Na oo ina gau ana pisinisi musika uma na amataina. Na pe se vaega tele o lona tino, ona taumafai lea e tau toe faagaoioi lona tino ina ia mafai ona ia faia nisi mea. Ma, o se tasi o taunuuga o lea taumafaiga, o le pese ta'uta'ua o le "Messiah"!

Na taufai maua e Isaac Watts ma George Frideric Handel le mea moni, o le Atua "e afio mai e fai ana faamanuiaga, e tafe atu ma ufitia ai puapuaga ma mafatiaga o tagata." Mai faanoanoaga, e mafai ona faatupuina ai e le Atua le olioli tele.

I lenei Kerisimasi, tatou pepese faatasi i le pese lenei o le "Joy to the World" na tusia e Isaac Watts, ae faia le fati e George Frideric Handel, faavae i luga o le pese ta'uta'ua, "Messiah", na ia tusia.

## Joy to The World

Joy to the world! the Lord is  
come;  
Let earth receive her King;  
Let every heart prepare him  
room, And heaven and nature  
sing.

Joy to the earth! the Savior  
reigns;  
Let men their songs employ;  
While fields and floods, rocks,  
hills, and plains  
Repeat the sounding joy.

No more let sins and sorrows  
grow,  
Nor thorns infest the ground;  
He comes to make his bless-  
ings flow,  
Far as the curse is found.

He rules the world with truth  
and grace,  
And makes the nations prove  
The glories of his righteous-  
ness,  
And wonders of his love.

---

## A'afiaga O Suiga o le Tau: O Valo'aga mai le Feagaiga Fou

Pepa Mafutaga Matagaluega Faleata Iulai 2015  
Saunia e Seilala Luamanuvae - EFKS Ketesemane Fou

FAATOMUAGA: Poo a nei aafiaga o le suiga o le tau: O aafiaga e pei o matagi ma afa, oge, mafui'e, faititili, galulolo, siisii i luga le suasami, faatupula'ia le vevela, ma isi. Ia poo faalavelave faale-natura foi e masani ona faaupu ai nei aafiaga. Aisea ua faatupula'ia ai pea le tutupu o nei mea? O le talitonuga masani lava ma talia lautele, e mafua mai i Suiga o le Tau (Climate Change) ona o le tagata lava ma ana

faatinoga. Ae peitai e manatu lenei pepa, o Suiga o le Tau ma ona aafiaga ogaoga, e moni ma faamaoni, aua o loo valo'ia mai e le Feagaiga Fou. E tataua lava ona tutupu nei mea, aua ua leva ona fuafua ma faataotooto e le Atua i mea uma ole natura ma lana foafoaga. Ona tula'i mai ai lea o se fesili tatou te mafaufau loloto iai. "O le a le mafuaaga o nei Aafiaga o Suiga o le Tau". O le tali a le pepa, 'O le Atua le

mafuaaga, e pei o valoaga ma molimau a le Feagaiga Fou.' E faaalua ai le Silisiliese o le Atua o le Foafoaga.

### Tusi mai le Feagaiga Fou e lagolago ai le autu.

Mataio 24:7,29 - Aua e sii le taua a le tasi nuu i le tasi nuu, ma le tasi malo i le tasi malo, ona oo mai ai lea o oge, ma mafui'e i lea mea ma lea mea. (Signs of the End o Age). A mavae atu le puapuaga o ia ona aso, ona faapogisaina loa lea o le la, e le susulu mai foi le masina, e pa'u'u foi fetu mai le lagi, e luluina foi 'au o le lagi. (Coming of the Son of Man).

O se tasi lea o vaega o le tali umi a Iesu ina ua fesiligia e lona ausoo,  
*faaaauau itulau e 10*

# O LE LAUGA

saunia e

Tanoa Tunupopo FS, Galuega Faamisionare

Ofisa Tutotonu EFKS, Tamaligi, Apia.

Kenese 8:1-12; Luka 2:25-26

Matua: Kenese 8:12: “Ona toe faatalitali lea o ia i nisi aso e fitu, ona tuuina atu lea e ia o le lupe, ae ua ia le toe foi mai lava ia ia te ia.”

Manatu Autu: O le Atua e tali mai i lona taimi.

Faatomuaga:

E iloa le tautai potu i soo se taimi ma lona tau. O lona tomai ma lona agavaa i le gataifale, na te iloina le taii e tatau mo le alofaga (fagotaga). E taga'i le tautai i ao o le lagi, e fua i le savili, e fua foi poo le a le upega e fetau ma le alofaga.

E faapena foi i folauga i luga o le vasa e faaoga ai vaaalo. E iloa e le tautai potu le la e sisi i lea taimi ma lea taimi e fua i le mea e agi ai le savili. Afisaga le savili ua sisile la fala, ae a lugaluta le savili ua sisi le la afa. O le faautaga mamao lena o le tautai potu, na te iloina ai le taimi e tatau.

E faapena se mafaufauga faaleagaga mai le tusi o Kenese o loo i le faitauga o le lauga. O se feau e faamamafaina ai le Atua o le tautai potu na te iloina le taimi e talafeagai e tali mai ai i lana tagata faatuatua i soo se mea o loo ole atu ai i le Atua. O le faitauga mai le tusi o Kenese o le tala ua ifo ai le lolo, ma le taimi o le Atua o iai le laolao e mapu ai lana tagata faatuatua.

I le amataga lava o le mataupu lenei e 8 o loo iai le upu 'manatua'. “Ua manatua e le Atua Noa”. I lona uiga i le gagana Eperu, 'faatua'. A toe faitau la le fuaiupu e faapea: 'Ua faataua e

le Atua Noa'. E aveesea ai le manatu ua faagalo e le Atua Noa e ala i le uiga faafeagai o le upu manatua.

Ua tatou iloa ma a'oa'oina i tatou i le mataupu silisili iloga o le Tusi Paia, o le tagata e tumau ma faatuatua i le Atua, e manuia ma amana'ia e le Atua. O le ola faatuatua e faavae i luga o le ola faamaoni o le tagata i lana pito laau e usita'ia ai mea ua finagalo iai le Atua ina ia ola ma mulimulita'i iai. Aua o le pito laau lava a le Atua ma lona faamaoni e le fesiligia i aso uma ma taimi uma.

E faapena le ola faatuatua o Noa i le Atua, ua fai ma ala ua amana'ia ai e le Atua ua le gata o ia ma lana fanau, o meaola uma atoa ma lana foafoaga pa'ia. O le ala ta'ua lea i le Kenese 6:9 o loo iai upu e faapea: “sa la feoa'i o le Atua ma Noa”. O le upu feoa'i e uiga tutusa ma le upu 'savavali'. O lona uiga sa savavali faatasi le Atua ma Noa. O le faailoga o le tagata faatuatua i le Atua. Na ona fai atu o le Atua ia Noa e fau le vaa ona faia lea e Noa o mea uma e pei ona poloai mai ai le Atua e aunoa ma se fesili. (Kenese 6L22). Fau i luga o lona faatuatua i lona Atua, auaua ia mautinoae manuia ai.

O le ala manatua lea e le Atua o Noa i taii o faigata aua o loo lelei le ola faatuatua. Ae le na ona manatua ae ua tatou faitauina mai i le fuaiupu 1-3 ua iloa ai ina ua manatua e le Atua Noa ona galue loa lea ma ua maui atu le lolo. Le taimi o Noa ma lona aiga ma manu uma nai le vaa. Le taimi o loo fesoua'ina i totonu o le vaa. Leai se ola saoloto, na o le faatalitali i se taimi ma se itu aso e filemu ai.

Ua to'a le vaa i atumauga, o nofoaga maualuluga (fuaiupu 4).

O le talitonuga o Isaraelu e afio le Atua i mea maualuluga. O lona uiga ua lalata Noa ma lona vaa i le Atua. O le laolao e mapu iai lana tagata faatuatua na fesoua'iina i peau laga o le olaga, i 'a'ao alofa o le Atua.

O le lolo o loo iai mafaufauga o le isi foafoaga fou lea a le Atua. O le ala o le faaumatia ma oo mai le faamasinoga a le Atua i le lalolagi tui ona o le agasala. Ae o le uiga foi lenei o le tusi lenei o Kenese, o le tusi o Amataga. Fai mai le fuaiupu e 5 - 'ua manu ai tumutumu mauga'. O le faitauga e o gatusa ma le aso lona tolu o loo i le tala o le foafoaga i le mataupu muamua o le tusi o Kenese fuaiupu e 9. O le aso na tuu eseeseina ai e le Atua le vai ma le elele matutu. O le faailoga o le lalolagi fou ma lona amataga fou ina ua faaumatia e le Atua e ala i le lolo le lalolagi agasala. O le amataga fou ua le gata i mea o le foafoaga, ae faapena foi i le ola faafouina o Noa ma lona aiga a o iai i totonu o le vaa.

O loo taua le numera 40, faitau mai le aso na manu ai tumutumu mauga, o aso ia o le ola tofotofoina o le aiga o Noa, e pei foi o le 40 tausaga sa iai le nuu o le Atua i le vao ina ua o ese mai Aikupito. E faapena foi i le 40 o aso na tofotofoina ai Iesu i le vao. O aso o le *tofotofoga* i le ola faatuatua ina ia faamausali le sootaga o le tagata ma le Atua ae lei tuuina atu i le ola saoloto.

E lua manulele na tuuina atu e Noa ina ia iloa ai poo ua matutu le elele, ae poo le taimi tatau lea e ulufafo ai ma le vaa o ia ma lona aiga ma manu. O le Oreva ma le Lupe.

O le Oreva ua faauigaina o se manu le mama, e pei foi ona iai i le lisi o manu le mama o loo i le tusi a Levitiko. E ala ona le mama ona o ana mea e 'ai ma lona natura ua ta'u le mamaina ai. O le le toe fo'i mai i le vaa ona e mafai ona

*faaauau itulau e sosoo ai*

---

# O LE LAUGA

ola pea e ala i tino o manu o loo i luga o le vaito'a. O lona uiga e le'i oo lava i le taimi tataua mo Noa ma lona aiga e ulufafo ai. E faatolu ona tuuina atu le lupe ina ua le toe fo'i mai le Oreva. I totonu o lea faatolu e fitu aso le va. O le numera fitu e faatatau i le taimi o le Atua e mafaufau loloto ai le tagata faatuatua. E le o le fitu aso, ae o le taimi o le Atua e aumai ai manu i le tagata. Lea na onosa'ia e Noa ma lona aiga e ala i le faatuatua. Sa faatali Noa, faatali seia oo ina ia ulufafo i le lalolagi ma le siosiomaga ua faafouina e le Atua, fai lona mo le tagata ua saoloto.

Alu muamua le lupe toe fo'i mai, talitonuina e le manu Noa ma lona vaa. O le nofoaga e mapu ma saogalemu ai. Tuu faalua e alu, foi mai ma le lau olive mata. O le faaaliga, ua ali uluulu o laau, o le faailoga ua ifo le vai na fa'ao'oa le faamasinoga a le Atua. Lau Olive o le faailoga o le filemu i Palesitina. Lea ua lele mai ma le lupe ia Noa na te aumai ai le filemu o le Atua ia Noa ma lona aiga ma manu uma nai le vaa. Ae manatua foi o le lau olive o le faailoga o le manumalo i Eleni ma Asia Itiiti. O le ata manino foi lea o le manumalo o le tagata e faatali i taimi o le Alii. Lea o loo fai mai ai le Isaia 40:30-31: "E vaivai ma tigaina tama matutua, o taulele'a foi e pauu lava i latou, a o e faatalitali i le Alii, e toe faafouina lo latou malosi; latou te sii a'e apaau e pei o aeto, latou te femo'ei, ae le vaivai, latou te savavali ae le tigaina."

Tuu faatolu le lupe e alu, ua le toe fo'i mai. Ua nofo i le lalolagi ua faafouina e le Atua, o le ata manino o le saolotoga e faia e le Atua mo lana foafoaga. O le saolotoga ma le manuia lea o le tagata e faatali i le taimi ma le aso

o le Atua.

Le au uso e, e 150 asoo le lolo, ua to'a le vaa i luga o le mauga o Ararata. Ua mapu atu le tagata faatuatua i aao o le Alii mai le tele o fita o le ola. O le 40 aso o le faailoga o le tofotofoina ma le ola faafouina o Noama lona aiga ae sa faatalipea ma le tatalo Noa ile aso ma le taimia o le Atua e aumai ai le saolotoga ulufafo ai. Lea na fai ai le lupe ma ona apaau, o le avefeau a le Tala Lelei na te aumaia le tali a le Atua ia Noa. O le tali i le saolotoga ua tuuina atu e le Atua ia Noa e ulufafo ai i manuia ua saunia e le Atua mo lana

tagata faatuatua.

Le taimi lea o le Alii ua leva ona faatali iai Simeona e pei o le tusi o le Feagaiga Fou. O ia lea na faaali iai le Agaga Paia e le oti lava seia tago ona lima, vaai ona mata i le afio mai o le Mesia. O le faaaliga sa faatali, ma faatali pea iai Simeona i le taimi ma aso o le Atua e faataunuuna ai. Lea ua vaai tino iai i le atoaga o le alofa tunoa o le Atua mo le tagata e ala i le afio mai o le mesia. O le na te faaola ma faasaoloto le tagata mai le pologa o le agaala. Fai mai le upu o le tatalo a Simeona: "Le Alii e, e te tuuina atu nei lau auauna, ia alu ma le manuia, pei o lau afioga, auaua iloa e o'u mata lau faaolataga."

---

## Ia e Utu O'u Loimata i Lau Fagu

Salamo 56:8 - "*Ua e faitauina lava lo'u fesolasolata'i; ia e utu o'u loimata i lau fagu; e le o iai ea i lau tusi?*"

E talitonu o le fagu o loo ta'ua i le fuaiupu lenei o le Salamo, e faatatau i le fagu mo loimata sa maua i nisi o tuugamau mai anamua anamua lava, e faapea sa faaoga e utu iai loimata o aiga ma uo a le ua maliu, i le taimi o lona falelauasiga. O fagu ia sa faia i le tioata poo le 'ele, ma e eseese o latou tino mai ma le lapopo'a. E mafolafola i le pito i lalo, ae faa'umi'umi lauitiiti le pito i luga e iai le gutu o le fagu, e pei lava o le tele o fagu i aso nei.

Sa molimauina mai e Morier, o se tasi e poto i mataupu tau tu ma aganuu a tagata anamua, e pei o tagata Peresia, e faapea, o ni potopotoga tetele o tagata faanoanoa ona o se maliu, e fealua'i ai i le mea lea se ositaulaga, i le taimi o le tagitu'i o tagata, ma too mai loimata o tagata

o loo fetagisi, i se vavae, ona aumai lea ua tataua ma le matua faateete lava, i totonu o le fagu. Sa talitonu nisi o tagata o Peresia e faapea, i le taimi o le luluti o tiga ma mafatiaga o le faasolosolo atu ina oti o le tagata, ma ua faasilitofo uma ni vaifofo, o le taimi lea e faatulu ifo ai se mataua o loimata mai le fagu o loimata, i le fofoga (gutu) o le tagata. O le molimau e faapea, na toe malolosi ai nisi ma'i toetoe ina a feiti.

Ae fai mai foi nisi tagata su'esu'e e le o fagu ia o faasino iai le fuaiupu o le Salamo, ma e le o iai foi se talitonuga sa faaoga lea tu e tagata Eperu. Fai mai i latou, e faasino le fuaiupu i fagupa'u sa teu faalelei ai ni mea totino taua ma le taugata, pei ona ta'ua mai e le Evagelia a Luka 12:33: "...ia fai e outou ni a outou taga e anagata, o le 'oa i le lagi e le uma lava, e le taitai ane iai se gaioi, e le 'atia foi e se mogamoga."

*faaauau itulau e sosoo ai*

---

# Ua Talanoa Mai i Lona Sauaina ma Lona Tuulafoa'iina

Faato'a mae'a lava lo ma nanati solo i le vai taimi e sauniuni ai mo le a'e o a'oga, i le faatauga o lavalava ma togiga mo la'u tama teine. Ua ma fiafia ua mae'a le faatau, a o le faalavelave, ua matua tutupa o'u vae i le tiga i o'u gugu, atili tiga ai ina ua ou tago atu i la'u 'atotupe, ua gaogao'i'i. Ae le'i faapea la'u tama teine e sefulutolu ona tausaga. Ua matua fiafia ua maua ona 'ofu fou ma ana togiga.

"Mama, fia oo i le fale se'i fa'aa'oa'o o'u 'ofu fou, ma seevae ma a'u pine." o le tala fiafia lea a la'u tama ma tafitifiti solo i totonu o le faleoloa. Leai lava ma sona foliga lelava pe 'e'eva i le feosofa'i solo. E le pei o a'u lea ua fufula tapuvae i le umi ona tu i le faleoloa. E le mapu le gutu i le talanoa mai e uiga i ana mea ia ua uma ona ma faatau, ma lona fia oo i le fale ae se'i faaa'oa'o.

Ua leva ona ou taumafai e talanoa i la'u tama, i le tele o mea o le olaga e taua atu i lo lavalava, ma seevae, ma vali laugutu. Ae ou te le mautinoa pe faapefea ona ou talanoa iai.

O le mea moni lava, e mafua mai i le faaletonu o lo'u ola faaleagaga. O vaega o le Tusi Paia ou te faitauina, ma lauga a faifeau ou te faalogo iai, peisea'i e le oo ifo i lo'u loto so latou uiga taua mo a'u. Ae o ia lagona na mafua ai ona ou

amata ona ou tatalo ma le naunauta'i mo le ta'ita'iga a le Atua i lo'u olaga.

O le a ma oo i le ma taavale ae ou faalogoina le valaau a se tamaloa o savali aga'i mai. O lona mana'o e faigofie lava, o sina tupe ma ia e faatau ai sana mea'ai. Na ou vaai lelei atu iai ma ou iloa ai le tafe ifo o le afu i ona alafau, ma lona muaulu. E ta'e se isi o ona nifo, e foliga mai foi ua leva e le'i ta'ele, pe pulumuina foi ona nifo. E pupuu lona lauulu, ma lona pulou taumata e faasaga i tua. Na ou pulato'a iai ma ou matauina ai le pupula faananau mai o ona mata, pei e iai se mea e sili atu i lo mea'ai o loo ia moomia. Na sa'eu le ta'ele o la'u 'ato pe o le a se tupe o totoe ai mo le tamaloa, ae oso mai i lo'u mafaufau le manatu, pe le tatau ona ou talanoa i le tamaloa e uiga i le alofa o le Atua, ina ia fai lea ma fesoasoani i lona tagata mafatia. Na maua le tupe, autago foi la'u tama i lana tama'i 'ato ma to mai ai nai tupe siliva. Na ou tuuina atu i le tamaloa le tupe ma ou fai iai, pe a pe a matou tatalo mo ia ma ona mafatiaga. Na 'ioe mai. Na matou soso i autafa o le ala ma matou nonofo ifo ai i sima o iai. Na nofo ifo i lalo le tamaloa, ma tago ua tuu le tupe i le 'ele'ele ma faataatia ai. Na ou punou ifo i

ona tafatafa, tuu lo'u lima i luga o lona tau'au, ma ou fesili iai pe ua na iloa Iesu le Faaola. Na ou matauina le feme'ia'i o la'u tama pei e matamuli i a'u mea ia e fai a o lea e fesavalai'i solo ane tagata i le ala. Pei e ma la'u tama. E autilo mai foi tagata, pei e 'a'amu, ma ou fesili ifo ai foi a'u i lo'u loto, pe sa'o 'ea la'u mea lea e fai a o lea e vaavaai mai tagata ma tauemu. Ae na te'a ia masalosologa ina ua amata ona ou tatalo mo le tamaloa, faaopoopo mai iai ma le fai mai o le tamaloa, na te fia iloa atili ni tala ia Iesu Keriso, ona ua ia talia Keriso e fai ma ona Faaola.

Ina ua mae'a la matou tatalo, na ou iloa ai le masaesae o ona 'ofu ma ona seevae. Na ou tau mafaufau pe o a tonu a'u upu na fai i la'u tatalo ua mafua ai ona fia malamalama le tamaloa ia Iesu. Ona ou lagona lea, leai, o lo'u faalatalata atu iai i lona tagata e le ta'ele, leaga ona lavalava, a ua tuu atu iai i luga o lona tau'au lo'u lima, ma ou tatalo mo ia. A o le tamaloa e le taumate lava e uiui mamao ai tagata e le fia soso iai, ona o ona lavalava, ma lona manogi, ma lona palapala.

Na uma le ma tatalo ona talanoa mai ai lea ia a'u e uiga i lona tagata, ma mea faigata ua oo ia te ia, le le vaai lelei o ia e ona matua, tuutua'i o ia, sauaina, maua i le fia'ai i le tele o aso. Ua maligi nei ona loimata ma fai mai ia te a'u, e le'i talanoa atu lava faapea se isi ia te ia e pei ona ou talanoa atu, e le'i pipii atu foi se isi ia te ia e pei ona ou tuu o lo'u lima i luga o lona tau'au, e oo lava i le tina o lona tina sa tausua o ia, e le'i faia lava o ia faapea e pei ona ou soso atu ma ou talanoa atu ia te ia. Ina o le a matou faamavae, ona tago mai lea i lo'u lima ua sii a'e, ma sogi iai. Ona savali ese atu ai lea ma ma'ua.

Na ou manatua le fetalaiga a le Alii: 'Aua na outou faia i le aupito itiiti o o'u uo nei.....o a'u lava lea ua outou faia iai.'

---

## Ia e Utu O'u Loimata i Lau Fagu

Ae iai le talitonuga maumaututu o nisi, o le uiga moni lava o le fuaiupu, o le taua o loimata maligi i le taimi o faanoanoaga ma mafatiaga o le tagata. Teu la mea ia. Utufagu! Manatua!

I le tatou aganuu faa-Samoa, e faalogo pea i upu e tali uiga faatasi ma talitonuga ia mai anamua. "E te le tau sau ma se mea, aua a ou vaai atu lava i lou faamalo'ulo'u

mai, ma lou auai mai, ma ou loifofoga maligi, talofa e! ua e faamafanafanaina ai lava leni aiga i o matou taimi faigata. Faafetai alofa." E taua tele i le aiga faanoanoa le auai mai, ma fetagisi faatasi ma latou. Latou te manatua le itu lea. Latou te malamalama foi i le mafuaaga o le leai o se mea o sau ma le tagata.

Afemata T. Apelu Aiavao

---

# IOANE KALAVINI

## O LE APOSETOLO A'OA'O ATU

### I le Maketi mo se To'alua

O le a e matauina i le mataupu lenei o le tusi e sea sea ona tautala Kalavini e uiga i lona tagata lilo poo ni ona lagona tau ia lava. Na ona tatou tau matemate pe o a ona lagona pe a tatou matauina lona soifua i aso uma.

O se vai taimi pe ua lata ina atoa lona 30 tausaga, na amata ai ona mafaufau Kalavini e faaipoipo. Ae oo mai i lea taimi, e le'i alu lava iai sona manatu. O lana uo, o le Tala Lelei, ma e sa tuuina uma iai ona taimi mo lona faalauteleina.

O lea la ua sui ona lagona, ae na te le'i tusia lava pe aisea na suia ai ona lagona, ae manatu le toatele, e mafua mai i lona nofo i le aiga o Pusa (Bucer).

O Pusa ma lona to'alua o Elisapeta, e ma'eu lava le lelei o le la ulugalii. Sa ta'ua lo la fale o le "fale o le amiotonu"; e tumu i le talie ma le mafanafana o le mafutaga.

O le au toe fuata'i ma le au sulufa'i i Europa, e tele lava ina mapu atu i le aiga o Pusa mo faamanuiaga ma a'oa'oga e maua mai ai. Sa fautua foi Pusa i ana uo i le galuega, ina ia saili le to'alua o le tagata, ma fiafia ai i le mafutaga i le olaga faaipoipo. O uo mamae uma a Pusa i Salasipeka, ua faaipoipo uma ma ua fiafia i le mafutaga faaulugalii faaipoipo.

E le taumate o le tasi mea na mafua ai ona mafaufau Kalavini e faaipoipo, ona o le mea sa nofo ai. Na ia lisiina se fale tele i Salasipeka, ona ia fai lea i lona uso ma lona tuafafine i Basel e o atu latou te nonofo, ma fesoasoani i le totojiina o le lisi. Na ia talia foi nisi o tama o a'o'oga mo le galuega e o atu latou te nonofo. Na tofotofoina ai lava i ia suiga lona onosa'i, ona taimi, ma le

faaaogaina o ana tupe. Ou te talitonu sa moomoo o ia i se olaga e faafiafiaina ai o ia. O tausaga ua te'a o lona olaga sa ia fesoasoani ai i isi tagata, ma ua fiu ai foi. E pei ona faaalua i le tusi o lolomi atu i lalo na ia auina atu i nisi o ana uo, na mana'o Kalavini i se tasi e vaaia ma tausua o ia. Na ia saili se fesoasoani mai ana uo, i le sailiga o sona to'alua:

*"Ma ia outou manatua le mea ou te fia maua i se tama'ita'i, aua e le pei a'u o isi tagata ia latou te talia uiga le lelei o tama'ita'i ia ua alolofa iai, lea e faamuamua ai e latou le lalelei ma le manaia o fuaitino. Ona pau lenei o le lalelei ou te sa'ilia - o le le faitaaga, e le lotoa, e onosa'i, ia manatu mamafa foi i lo'u ola maloloina lelei."*

Na fai le filifiliga a Kalavini i ni tama'ita'i se to'atolu na fautuaina atu e ana uo. O le tama'ita'i muamua e mau'oloa, ae le iloa faa-Farani, ma e musu fo'i e a'o lea gagana. Na popole Kalavini i lona maua o se tamao'aiga, ona o le vai taimi lea, e iai se faifeau/patele o loo fetu'ua'iga i mea pi'opi'o o faia e le Katoliko e le o fiafia iai tagata. Ma le isi mea, o le a lona aoga e avea ai ma to'alua pe a le ilafia tautala i le gagana Farani?

O lona lua o tama'ita'i, e Farani ma e na te lagolagoina le mau a Porotesano, a o le faalavelave e 15 tausaga e matua ai ia Kalavini. Na ia talitonu e le o toe umi lona ola. O lona tolu e foliga mai e lelei i itu uma o ia mana'o iai; ma o lea na sauni ai loa e faaipoipo. Peitai, ua le iloa lava le mafuaaga tonu na le oo ai ona faaipoipo.

Ua fesoua'i le mafaufau o Kalavini, ona ia tusi ai lea ia Farela

e ta'u iai ua ia manatu e sili ona tuu ia lea fuafuaga o le faaipoipo. O le taimi lea na fai atu ai Pusa pe a pe a nonofo ma Iteleti Sitotua (Idelette Stordeur). O Iteleti o se tama'ita'i ua oti lana tane ma e iai lana fanau e to'alua, o le tama ma le teine. O lona to'alua muamua o Sini sa faifeau i se aulotu i Sineva a o iai i lea aai ia Kalavini. Sa iai se eseese o Kalavini ma Sini ona na malo Kalavini i se la finauga i mataupu silisili. Na oo ina siitia Sini ma Iteleti i Salasipeka ma toe feiloa'i ai ma Kalavini, ma mafana ai le latou mafutaga. Na oo ina lagolagoina e Sini ma Iteleti talitonuga o Kalavini ma avea la'ua ma nisi o lana aulotu. Na papatisoina foi e Kalavini le la tama tama. Na oti i le faama'i tele a o iai i Salasipeka ia Sini. Na matua faanoanoa Iteleti ina ua maliu lona to'alua, ma e na matua faanoanoa ai foi ma Kalavini ona na ia manatu ua maliu atu se tasi o ana uo pele.

O se tama'ita'i lalelei Iteleti mai se aiga tamalii mauoloa. O se tama'ita'i sa tuputupu pea i luga lona faatuatua. O ia o se tasi o tagata su'esu'e i le Upu, finafinau i le tatalo ina ia faia i Salasipeka le finagalo o le Atua.

Na talia e Iteleti le mana'o o Kalavini la te faaipoipo, ona faaipoipo ai lea ia Aokuso 1540. Na faia e Farela le sauniga o le faaipoipoga.

E le'i avea lea ma mea na faaitiitia ai le galuega faafaife'au a Kalavini. Sa valaauina pea lava pea o ia e lauga i fonotaga. Ma o vaiaso muamua e 45 o le la aiga, e 32 vaiaso na tuua ai e Kalavini lona to'alua fou ona o ona valaaulia e lauga i ni fonotaga. Ae le'i popole ai Iteleti, ona, na ia malamalama faaauau itulau e sosoo ai

---

# IOANE KALAVINI

## O LE APOSETOLO A'OA'O ATU

lelei lava i le galuega a Kalavini a o le'i nonofo, ma na talia Kalavini e fai ma ona to'alua. I aso e le iai Kalavini i le aiga ona o le galuega, e tausi lelei lava e Iteleti lo la fale ma isi a la aseta, o fale foi. Ina ua aafia Salasipeka i le faama'i tele, ona ia sii lea o lo la aiga i se isi vaega o le aai o loo saogalemu se'ia oo ina te'a le faama'i. Sa faaaloologia lava o ia e tagata ona o ona uiga tamalii ma le loto mau. E atoa le tausaga talu ona faaipopo ae maua mai Sineva le valaau e le'i faamoemoeina, ina ia toe fo'i atu i Sineva e faifeau ai.

### Toe Fo'i i Sineva - o le Faalua ai Lea.

O le taunau a Pusa na matuu ai le loto o Kalavini e toe foi i Sineva. E ui lava o lona faanaunauta'iga ina ia faalauteleina le galuega a le Atua, ae popole lava lona mafaufau i le toe foi i lea aai faigata. O tusi na fai e Farela na ia taunauina ai Kalavini ina ia toe foi i Sineva. Na tali iai Kalavini i sana tusi faamomoi loto ma ia ta'utino ai, o ai na te tuua'ia o ia i lona le fia alu i Sineva o loo tumu i le vevesi e ono lamatia ai lona ola.

O Salasipeka, o se nofoaga saogalemu mo ia ma lona aiga. A o le fautuaga a Pusa, ia alu atu Kalavini i Sineva mo sina vai taimi ona toe fo'i ai lea i Salasipeka. Ona pau lea o le faaloto tele na maua e Kalavini i lenei fuafuaga - o le faamoemoe lea e toe foi i Salasipeka. Ma o le fuafuaga a Kalavini ua fai, o le a siitia i Sineva mo ni nai masina na te faatulaga lelei le Ekalesia. Peitai, na atoa le 23 tausaga o iai Kalavini i Sineva, ma maluu ai.

Ua taunuu atu nei Kalavini i Sineva o se faifeau e matua fiafia ma sailia e tagata, logologoa ma faaaloologia. E ui lava i uiga fiafia o tagata o le aai ina ua toe fo'i atu, ae sa faanoanoa lava ina ua siitia i Sineva. Na ia ta'ua lona toe fo'i i Sineva, "o le taulaga mo le Alii."

O le mea moni, na matua taumafai ma le atoatoa Sineva ina ia toe foi atu Kalavini ia latou. Na auina atu e Sineva i Salasipeka se amiga uiga ese, o le taavale solofanua manaia e lua manu e tosoa. Na uta iai le aiga, ma momoli i se fale ua faatotogaina i meaafale mananaia, e lata

i le malumalu, ma e matua manaia foi le vaai atu i le fale i le vaituloto e lata ane. Ae ui lava i nei mau mea na faia ina ia fiafia ai Kalavini, ae na taunuu o ia ma lona aiga i faitotoa o Sineva ia Setema 1541, ma ona loimata maligi.

Ina ua taunuu o ia ma lona aiga ma ulu atu i faitoto'a u'amea o le fanua o iai le fale, a o le taimi lea o loo faitauina ai e Vileti, o se uo a Kalavini, se tusi na auina atu ia Kalavini o loo faamatalaina ai ona lagona i lona toe fo'i atu i Sineva. O se tasi o fuaiupu fai mai, "E leai se nofoaga i lalo o le la e sili ona ou fefe ai i lo le aai lenei."

### Ua Tuputupu a'e pea Talitonuga Faa-Kalavini

E le'i faamafanafanaina le loto o Kalavini i le tele o saunoaga faafetai, ma viiviga na fai atu mo ia e tagata aemaise ai le malo, ina ua toe fo'i atu. E tolu aso talu ona faamautu i Sineva ae fai lana tala ia Fareli, "E pei ona e mana'o iai, o lea ua ou faamautu iinei. Talosia ina ia ta'ita'iina e le Atua mo se lelei." Ina ua lauga Kalavini i le malumalu i lo latou Aso Sa muamua, na ia faaaauina ai le mataupu na ia faaaogaina i sana lauga i lea lava pulelaa i le tolu tausaga ua mavae.

O le Kalavini sa mua'i iloa e Sineva, e maitaita ma mamafa ana lafoga. Peitai o lona galue faatasi ma faifeau matutua i Salasipeka na fesoasoani lea i le tau taofiofia o ana lafoga mamafa ma le loto ma'ale'ale. I sana tusi na auina mai Sineva ia Pusa na ia faapea ai, o le a galue ma le onosai ma le loto alofa faauso.

E le'i toe faatali Kalavini a ua matua faasaga atu nei e fai le galuega, ma ua avea lea ma mea e faagalogalo ai lona fefe ma popole i lona iai i le aai o Sineva. Na talitonu o ia o lana galuega muamua lava o le faatulagaina ma faamaopoopo le Ekalesia. O le mea moni, o lona iai i Salasipeka na fesoasoani tele lea mo lea galuega. O le malo i Sineva na vaevaeina i vaega e tolu - o le Fono Laitiiti, o le To'a Selau, ma le Fono Tele.

Na faaaogaina e Kalavini le Upu a le Atua e fai ma faavae o ana fuafuaga, ma ia vaevaeina ai le galuega - o faifeau, o faiaoga, o toeaina, ma tiakono. O vaega ia e fa na aofia ai le galuega atoa a le

Ekalesia - tapua'iga, a'oa'oga, o le ola mama, ma galuega o le agalelei ma le alofa.

O lenei faavae na amata faaaogaina e Ekalesia Porotesano mai le senituri sefuluono se'ia oo mai i le aso. Aemaise lava i le Ekalesia Papatiso, e ui lava e le o amana'iaina tele le faiaoga i nei aso. O tofiga e le'i amana'iaina e Kalavini o le tofi aposetolo ma le perofeta. Ae sa faatulaga e Kalavini lana galuega i lalo o le tofi faifeau (pastor), e ui lava o le galuega sa ia faia, e mafai ona faaupu moni lava "o le aposetolo a'oa'o atu".

O faavae ia na ia toe fuata'i ai le Ekalesia. E leai se faatulagaga faapea sa fai e le Katoliko. O le faatulagaga a Kalavini, o le faiga lea e aupito sili ona latalata i mea moni mai le Tusi Paia i na aso. Ae ui lava na te le'i amana'iaina ia tofi o le aposetolo ma le perofeta i lana faatulagaga, sa matua mulimuli lava o ia i le Tusi Paia. Mai lenei faavae na tupu mai ai se vaega o Porotesano na ta'ua o Kalavinisi. Ma o lenei vaega na tula'i mai ai nisi o failauga iloga e pei o Charles Spurgeon, Jonathan Edwards, William Carey ma David Brainerd. O loo faaaogaina pea e le tele o Ekalesia lenei faiga e oo mai i le aso.

### O le Tofi Muamua - Faifeau

O faifeau e laugaina le Upu, a'oa'o, faatonu, faatino sakalameta, ma, faatasi ma toeaina, fai ni suiga mana'omia i le faamaopoopoga o le Ekalesia. E tatau ona sogasoga i le tatalo ma anapogi ina ia mafai ona laugaina ai le Upu ma le sa'o. E le tatau ona aafia i latou i le tausiga i aso taitasi o le faamaopoopoga, pe mafatia foi latou i le asiiasi ma vaaia mana'oga e tele o tagata lotu. E tatau ona tatalo i latou mo e mama'i i le nuu atoa, i le ta'ita'iga a le Atua.

Sa mamafa lava i le mafaufau o Kalavini le galuega a le faifeau e na o le Upu ma le tatalo, ona na talitonu o ia, o le lauga e pei o se "asiiasiga mai le Atua, lea e faaaogaina e le Atua e 'a'apa mai ai ona 'a'ao e ta'ita'i atu tatou ia te ia." E ita tele Kalavini pe a faatalale ana faifeau i le mea lea, ma na te matua faasalaina i latou pe

faaaauu iulau e sosoo ai

---

## *A Page for Youth*

### ITULAU MO TUPULAGA TALAVOU

---

# O le Aso na Lanu Auro ai le Fetu Lanumoana

O loo tautau atu i fafo o le faamalama le fu'a mumu, pa'epa'e ma lanumoana. O loo su'i ai i le fu'a ni fetu se fa, e lua mo ni tama o faiava mai i lo matou aiga, ma le lua e mo tuagane o loo auai i le taua, i le vaega a le Neivi ma le Ami. O Vernley o loo i le taua i Aferika i Matu, a o Wesley o loo i se vaatau i se mea o le vasa loloa.

Na liuliu lemu le nofoa o Papa, ma faasaga atu i le faitotoa. Pei lava o se tu'itu'i mai a se isi. Ae tau le lagona e pei e fefe le tu'itu'i. Na tatala atu e Papa le faitotoa ma faafesaga'i ai ma se taule'ale'a o ofu i ofu o le ami, o faalala mai lona lima, ma tuu mai le tusi lanu samasama ia Papa. Ua tete lava le

lima o Papa a o 'a'apa atu e aumai le tusi. Na vave lava ona liliu le fitafita ma alu e le'i iai ma sana tala.

Ua tu nei Mama i tafatafa o Papa ma la faitau faatasia upu faamomoi loto o loo i le tusi: "Mai le Matagaluega o Taua a le Iunaite Setete. E faanoanoa lava matou te faasilasila atu ai o lou lua atalii, o Wesley, ua lipotia mai ua leiloa a o tau i le taua." O le alofa sa iai i le taimi faato'a nonofo le la ulugalii, o Hans ma Lilly, seia oo ina fanau le la tama ma faafailele, a'oa'o, ma oo ina tuu atu tamaiti e ta'itasi ma o, lea ua fusia faatasi le ulugalii i lo la taimi faanoanoa. Na te'a sina taimi o loimata maligi, ona tootuli ifo ai lava lea o Papa

ma Mama i tafatafa o le faitoto'a, ma la tatalo ma faafetai i le Atua ona o lona agalelei ia i la'ua, lea na aumai ai se atalii mo la'ua latou te ola faatasi mo tausaga e 26. Na faavavevave ona la auina atu fe'au faauaealesi i isi a la tamaiti, ona o ai lea i le lotu. O a'u le uii o le aiga e to'a fitu le fanau. E le'i to'a filemu faapea pei o Papa ma Mama lo'u loto ina ua aumai le tusi. Ona o Wesley, lo'u tuagane, o la'u uo, o le ou te faalagolago iai, o ia na te faatonutonu au. E tumu o ia i uiga ou te mana'omia i soo se tama. E taunuu mai le tusi mai le Ami o o'u asiasi i nisi o lo'u aiga e nonofo i luga o mauga o West Virginia. Faato'a ma fo'i mai ma le toalua o lo'u tuagane o Vernley, lea o loo tolauapi le latou vaega i le nofoaga o le Ami i Virginia.

Na ou ulu atu i le faitotoa o le fale, ae faafetaui a'u i foliga pulato'a ma faanoanoa o tagata ma ou faapea ai, "Aisea e foliga faanoanoa ai faapea." O le taimi lea na faapea mai ai le toaina o *faaaauau itulau e sosoo ai*

---

## IOANE KALAVINI

### O LE APOSETOLO A'OA'O ATU

*mai le itulau e 7*

a le faia. A fia faifeau se isi, ia avatu se faamaoniga o lona valaauina, faapea ma le ituaiiga olaga o loo ola ai. Ma a pasi mai le suesuega o lana amio, ona

suesueina lea o lona poto i le Tusi Paia ma le mataupu silisili. E tele laasaga e ui ai amata mai i faifeau, seia oo atu ina talia e le fonu ma tagata o le lotu.###

---

## Lotu Taeao i

### Falelauniu - Lotu

### Afiafi i Sogi/Fugalei

*mai le itulau muamua*

Faatonu, le Taitaifono o le Komiti a le Au Toeaina, Susuga Kerisiano Soti ma le faletua ia Laumata. O loo felafao'i ai le faiga o sauniga, o le lotu taeao e faia i Falelauniu//Tafa'igata, a o le lotu afiafi e faia i Fugalei/Sogi.

O le Susuga Kerisiano Soti, o le tausaga e 2015 na aulia ai ona

tausaga penisione, peitai ua tolo mai i le tausaga e 2016, sei mae'a galuega o feagai ai mo le faamautuina o aulotu ia e lua, ona malolo penisione ai lea pe a mae'a le Fonu Tele 2016. Ona saili ai lea o ni faifeau mo aulotu e lua, poo le tasi foi ne'i manana'o Falelauniu ma Sogi/Fugalei e tumau pea le latou aulotu, ei Falelauniu le isi vaega, ae i Fugalei le isi vaega.

E matua manaia lava le fanua fou ua iai le aulotu i Fugalei/Sogi. E siosioina e le togatogo ola lelei, e

maua ai le paalimago, ma le i'a o le tilapia. E ui lava ua le tele se paalimago, ae le taumate a toe fai se faasao, e mautinoa lava ona toe tupu tele le paalimago.

O le falesa fou o Sogi/Fugalei, e le taumate foi o se ata lea, ma se faaaoaoga mo aulotu laiti e fia fai ni o latou falesa fou. Aua o le fale o Sogi/Fugalei, e foliga mai i se fale o se aiga le vaai atu i fafo. E umi, ae vaelua. O le pito i tai, poo le lua o vaetolu o le umi o le fale, o le malumalu lea. A o le pito i uta, o le vaega lea e faaaoaga e le aulotu mo a latou mea e fai faaaulotu. O lona uiga o le maota lava e tasi, ae iai i totonu le malumalu ma le vaega e faaaoaga e le aulotu. E leai se gaogaosa, ma o se fausaga e matua faigofie ma taugofie. A vaai mai i le itu i sisifo o le fale, e te iloa mai ai le tia-sa o Tamasese o loo i Mulinuu, ma isi fale i le tolototo i Mulinuu.



---

*A Page for Youth*  
**ITULAU MO TUPULAGA TALAVOU**

---

## O le Aso na Lanu Auro ai le Fetu Lanumoana

lo'u aiga, "Vonnie, ua ta'u mai ua leiloa Wesley a o tau i le taua." E le'i uma mai ana upu ae ou 'e'e! Na ou ulufafo ma le fale ma ou tamo'e i le auala, tamo'e ai lava, tamo'e ai lava.....Ina ua uma lo'u malosi i tamo'e ma tagi, ona ou faagaulua ifo ai lea ma ou tagi i autafa o le alatele.

O le taimi lea na pa'i mai ai le Atua ia te au. Na ou lagona lava

lona iai i le mea o o'u iai. Ma musumusumu mai ia te au upu sa a'oa'oina ai a'u e ou matua a o ou teineitiiti. *"E faasaga a'e o'u mata i mauga, e oo mai ai lo'u fesoasoani. O lo'u fesoasoani mai le Alii lea, o le na faia le lagi atoa ma le lalolagi."* (Sal. 121:1). Ua ou vaavaai solo i le atu mauga o loo ou iai, ma ou lagona ai e pei ua tuu au e le Atua i totonu o mauga

ma faatepa iai o'u mata ina ia ou manatua ai mea sa a'oa'oina ai a'u e ou matua. O lo'u fesoasoani e mai le Atua lea. Ua ou lagona le to'a ma le filemu.

O se aso mulimuli ane na ou maua ai le tusi mai ia Wesley, na ia ta'ua ai le Salamo e 121, ma fai mai o le Salamo lea o loo fai ma faamafanafanaga ia te ia i ona taimi pogisa. Ua ou toe vaavaai atu i le atumauga, ma ou lagona ai, e iai le Atua i soo se mea, pe a e faalogologo lelei i lona papa'i mai ma fesoasoani ia te oe.

"My God shall supply all need according to His riches in glory by Christ Jesus (Phil. 4:19)  
*"A o lo'u Atua e fa'a'atoa e ia ia te outou mea uma e matitiva ai outou, e tusa ma le faula'i o lona viiga, ia Keriso Iesu."*

---

## Tata le Vaiolini a Nero a o Mu Roma

*mai le itulau muamua*

O le mea moni, e iai se afi tele na sosolo ma mu ai Roma i le tausaga e 64. Tatou te le mautinoa pe sa a'oa'ole le tata vaiolini a Nero i le taimi lea pe leai, tasi le mea ua tatou iloa nei, na faaaogaina e Nero le mu lea, na te faoina ai le vaega lea o le atunuu na mu, ma na pulea, ma fausia ai sona maota. Na ia tuua'ia foi le 'au Kerisiano o latou na amataina le afi, ma na amataina ai sauaga faasaga i le 'au Kerisiano, lea na oo ina maliliu faamatu o Peteru, Paulo ma isi.

O Nero e fetau tonu lava iai faaupuga o tusia i le Salamo 73:7 "Ua lululu o latou mata, latou te faasilisili i manatu o le loto." O lona uiga ua puputa o latou tino ma lapopo'a ona o le tele o mea latou te maua i lo latou tu'inanau.) Fai mai le fuaiupu e 7 i le gagana Peretania: (These fat cats have everything their hearts could ever wish for!)

Pe o le a lava lau vaavaai iai, e peiseai e matua le fetau lava i lenei tagata leaga, ona ia te ia se pule na te fasiotia ai nisi o uluai Kerisiano e pei o Peteru, Paulo ma isi. Ma tatou fesili ai, e le o silafia ea e le Atua? Ma afai e manumalo nei ta'ita'i leaga i aposetolo pa'ia, o le a la le aoga o le faapa'iaina? Ia, o le mea moni, e tele lava ina galo ia tatou le ata atoa, lea e silafia e le Atua, ae tatou te le o amana'iaina.

Ina ua valo'ia e Iesu le oti o Peteru, na ia faapea ai e avea le oti o Peteru ma mea e viia ai le Alii (to glorify God). "Ua ia fetalai atu lea upu e faailoa atu ai le uiga o le oti o Peteru e vivii atu ai o ia i le Atua." - Ioane 21: 19.

Ae fai mai Paulo: "Aua o lo'u ola ua ia Keriso lea, a o lo'u oti, o lo'u manuia lea." - Filipi 1:21.

O fea o iai Nero ma lona malo? Lea ua avea Roma ma nofoaga o le Ekalesia Kerisiano. Leai ni

auupega na faaaogaina, a o le faaolataga ia Keriso, le alofa i le Atua, alofa foi i le lua te tuaoi. Ma le faamagaloga e maua i le fe'oe'oea'i, fetausia'i, fefaapalepalea'i. Le alofa na aumai e Keriso e le tau'i ma sui, ae faamagaloga.

E faamoemoe foi le 'au Kerisiano e fai lea ma ta'iala i le sa'ilia o se fofo i sauaga o fai nei i le 'au Kerisiano i atunuu o pulea e isi tapua'iga - alofa i le lua te tuaoi, alofa faamagaloga, ma faamoemoe pea ma faatuatua i le Atua. O loo silafia e le Atua mea uma.

### God's Plans

"For I know the plans I have for you," declares the Lord, "plans to prosper you and not to harm you, plans to give you hope and a future. Then you will call upon me and come and pray to me, and I will listen to you. You will seek me and find me when you seek me with all your heart"  
Jeremiah 29:11-13

---

# A'afiaga O Suiga o le Tau: O Valo'aga mai le Feagaiga Fou

mai le itulau e 2

“Pe se a fo'i le faailoga o lou maliu mai, ma le gataaga o le lalolagi?” Lea ua manino mai ai o oge ma mafui'e ma le luluina o 'au o le lagi, e tatau lava ona tutupu, aua o lea na valo'ia e Iesu. O faailoga foi ia e ao ona tutupu i le lumana'i ma faataunuaina, ae lei oo i lona toe afio mai ma le gataaga o le lalolagi. O lona uiga, o mea e mafai ona tutupu ma taunuu, i le pule fai toatasi a le Atua i ona lava taimi talafeagai, ma lona finagalo e Pule Aoa o le mea uma o le foafoaga. E leai foi la se tagata soifua na te mafaia ona valoia le tutupu o nei aafiaga o suiga o le tau, ma se malosi foi o se tagata na te mafai ai ona faataunuaina nei aafiaga o suiga o le tau.

Mareko 13:7-8, 24-25 - Pe a tou faalogo i taua ma tala o taua, aua tou te atuatuva, aua e tupu lava ia mea, ae le'i oo i le gataaga. Aua e sii le taua e le tasi nuu i le tasi nuu, e iai foi mafui'e i lea mea ma lea mea, e iai foi oge, o amataga ia o puapuaga. O aso foi ia pe a mavae atu lena puapuaga, e faapogisaina ai le la, e le susulu mai foi le masina, e pa'u'u mai fetu o le lagi, e luluina foi 'au o le lagi.

O se tasi lea o vaega o le tali umi a Iesu ina ua fesiligia e ona soo o Peteru, Iakopo, Ioane ma Aneterea. “Pe se a foi le faailoga pe a lata ona taunuu o ia mea uma?” Lea ua manino mai ai, o oge ma mafui'e ma le luluina o 'au o le lagi e tutupu lava, ae le'i oo i le gataaga. O valoaga ia na valoia e Iesu e faamanino ai le fia malamalama o lona ausoo i mea o le a tutupu i le lumana'i. O faailoga ia e tutupu ae le'i oo mai le Aso o le Alii, e le gata ua luluina ai le lalolagi ma oo mai ai le

faamasinoga, ae o loo mulimuli mai ai ma se lalolagi fou, o le tupulaga fou ma le mamalu fou Silisili Ese o le Atua. O lona uiga, o mea e mafai lava ona tutupu ma taunuu, e le o mautinoa i le aso tonu ma se tausaga e tupu ai, ua na o le Atua i ana lava fuafuaga e pule i le taimi e tutupu ai. O se faamalosi i le faatuatua o le ausoo, e tatau ona tumau lo latou faatuatua i le Atua, aua ua na o le Atua lava i ona lava taimi e mafai ai ona tutupu nei faailoga.

Luka 21:11, 25-26 - E iai mafui'e tetele i lea mea ma lea mea, o oge foi ma faama'i, ma faa'ite'ite ma faailoga mai le lagi. (Signs and persecutions) E iai foi faailoga i le la, ma le masina, ma fetu, e atuatuva foi ma fememea'i nuu i le lalolagi i le u o le sami ma le sousou, e matapogia foi tagata i le matatau ma le faatalitali i mea e oo mai i le lalolagi, aua e luluina 'au a le lagi. (Second Coming of the Son of Man).

O le tali lea a Iesu ina ua fesiligia e ona soo, e pei ona molimau ai foi le Evagelia a Mataio ma Mareko. E aua uma lava saunoaga a Iesu i faailoga o mea e tutupu i le lalolagi i le lumana'i, a o le'i oo mai lona toe afio faalua mai. A fua iai i le tali a Iesu, o le u o le sami ma le sousou, o lona uiga o galu tetele poo sunami foi e pei ona molimauina i nei aso. O le luluina o 'au a le lagi, e foliga mai o loo aafia ai foi le sami ma galu tetele e tutupu mai ai, ma ua le toe saogalemu ai foi le siosiomaga. O lona uiga, o aafiaga lava ia o le suiga o le Tau, e tutupu i le lumana'i e pei ona valoia e Iesu, ae le'i oo i le taimi e toe afio faalua mai ai i le lalolagi.

Roma 8:22 - Aua ua tatou iloa,

ua oi faatasi, ma oono faatasi mea uma lava na faia, ua oo mai lava i ona po nei.

O le manatu lea o le aposetolo o Paulo e uiga i le manuia o mea o le foafoaga faatasi ai ma le manuia o le tagata faatuatua. Lea ua ia faailoa le afaina o le foafoaga i lea vaiata, e le gata o le faaleagaina o le siosiomaga, ae ua afaina faatasi ai ma le tagata. Ae ui lava i lea afaina, lea na ia faailoa o loo iai le faamoemoe, e faaolaina ai le tagata ma le siosiomaga. O le faamoemoe lea i le Atua ma lona Agaga o le mea e le o vaaia, e tatau ona faatalitali iai ma le onosai.. Lea na ia faamalosi ai i le au faatuatua, ua tatou iloa foi e galu le Atua i mea uma lava mo le lelei faatasi ma i latou o e ua alolofa atu ia te ia. O lona uiga i le aotelega o le manatu o Paulo, o le afaina ma le faaleagaina o le siosiomaga, ua loa ona silafia e le Atua, ua na o ia foi na te toe faalelei mea uma ua faaleagaina, ona o le faamoemoe ia manuia le tagata faatuatua.

Faaaliga 16:18 - Ona tutupu ai lea o faititili, ma leo, ma uila, sa iai foi le mafui'e tele, e le faapea ona tele se mafui'e ua tele na'ua talu ona iai o tagata i le lalolagi.

O le faaaliga lea na iloa e Ioane e valoia ai le oo mai o le to'asa o le Atua i le lalolagi, e ala i le faaaogaina o faititili ma mafui'e. O ni valoaga e aumai ai se feau o mea o le a tutupu i le lumana'i, ina ia faatoilalo ai le malosi o le malo o Roma i lena foi vaiata. A fua foi la i le faaaogaina e le Atua o faititili ma mafui'e e faaoo mai ai lona to'asa, ona manino lava lea o le pule Silisiliese a le Atua i mea uma o le foafoaga. E le gata e faailoa mai ai lona to'asa, ae o loo faailoa mai ai ma lona malosi, e le mafai e se tagata ona taofia. O lona uiga, o faititili ma mafui'e, o aafiaga lava ia o suiga o le tau, e tatau lava ona tutupu i soo se taimi, e pei o faaauau itulau e sosoo ai

---

# A'afiaga O Suiga o le Tau: O Valo'aga mai le Feagaiga Fou

valoaga i le Tusi o Faaaliga.

Afai la o nei aafiaga ma nei faailoga e mai le Atua, e iai la se tagata e mafai ona taofia le tutupu o nei mea? Ailoga e mafai e se tagata ona taofia le tutupu o nei aafiaga o suiga o le tau? E le mafai e se tagata ona taofia, aua foi e le mafai e se tagata ona faia se mafui'e, faititili, galulolo poo se matagi. E pei ona faailoa mai i tusi sii o loo ta'ua i luga, e leai lava se vaega o ta'ua ai, o nei faailoga e ao ina tutupu, o mea e mafua mai i le tagata. Ia pe faapea foi o le tagata na mafua ai nei suiga o le tau, ua mafua ai nei aafiaga. Ona o mea lava ua uma ona valoia, ma e tatau lava ona tutupu i le taimi fai toatasi a le Atua ma lana Pule Silisili Ese. E pau le galuega a le tagata e tatau ona fai, o le talia o nei aafiaga pe a tutupu mai. Ae aua nei ave le tutupu o nei aafiaga matuia, ma tau faafefe ia te'i tatou o tagata faatuatua. Afai o tau iai se popolega i le tutupu pea o nei aafiaga, lea ua uma ona faamalosi mai le Alii, "A afua ona faia o ia mea, ia tepa a'e outou, ma ia ea i luga o outou ulu, aua e latalata ina faaolaina outou." - (Luka 21:28)

O le aotelega lava o le talitonuga faale-faatuatua o lenei pepa, o nei aafiaga mai suiga o le tau, e mafua mai i le Atua, lea e manino lelei i le molimau tutusa a Mataio 8:23-27, Mareko 4:35-41, Luka 8:22-25.

O le tala ua tatou masani ai, i le vavaoina e Iesu o le matagi ma le vai. O se tasi lea o tala o loo faamauiina ai se tasi o vavega na faia e Iesu, na matua ofo tele ai lona ausoo. Ina ua faafuasei ona to le afa ma malosi peau o le sami, a o loo tofa Iesu, lea na latou saili ai ia Iesu mo se fesoasoani. Na o le saunoa lava o Iesu ma vavao le

matagi ma le vai, ona malu ai lea. E ese le taua o le fesili na fesili ai le ausoo ina ua vavao e Iesu le matagi ma le vai. "O ai ea lenei? aua ua fetalai o ia i le matagi ma le vai, ona usiusita'i ai lea ia te ia?"

O le faailoga lea ua na o le Atua lava i lona mana ma lana pule aoao, e usiusita'i ai mea uma o le foafoaga ia te ia. Afai o lea ua usita'i le matagi ma le vai, o lona uiga foi ua na o ia lava e mafai ona faatupuina le matagi ma le vai. O se vavega na mafai ai ona talitonu lona ausoo mai lo latou masalosalo, ma le itiiti o lo latou faatuatua. O le manatu maua luga foi lena o lenei pepa, ia toe faamanatu ai poo malosi poo itiiti lo tatou faatuatua, pe afai e tutupu matagi ma afa ma peau malosi, ma nisi aafiaga o suiga o le tau.

## Faamoemoe mo le Lumana'i

O le mea moni lava ua molimauina le ogaoga o aafiaga o suiga o le tau i lenei vaitau. Ua ave ai foi ma popolega tele i le lalolagi, mo le aga'i atu i le lumana'i. Lea ua taumafai ai atunuu uma o le lalolagi i auala e tau faaitiitia ai le aafia o suiga o le tau. Ae o le manatu lava o lenei pepa, i le vaai faale-faatuatua, o le lalolagi lava ia ma le foafoaga i le taimi nei, ua oo i se tulaga le lelei. Poo a lava la taumafaiga a le tagata, o le lalolagi lava ia ua leaga, e pei ona molimau ai 2 Peteru 3:7-9 - "A o le lagi ma le laloaga o ona po nei ua tuu mo le afi ona o lea lava afioga, ua taofia ai foi mo le aso e faamasino ai ma fano ai tagata faalemata'u. Ae aua nei lilo ia te outou, le au pele, lenei mea e tasi, e tusa i luma o le Alii le aso e tasi ma tausaga e afe, o le afe foi o tausaga e tusa ma le aso e tasi. E le faatuai mai le Alii i le mea na

folafolaina mai, faapei o le manatu a isi tagata i le faatuai, ae peitai ua onosa'i mai lava o ia ia te outou, ona ua le finagalo ia fano se tasi, a ia oo uma lava i le salamo."

O le faamoemoe lea mo le lumana'i mo le tagata faatuatua, o le toe afio mai o le Alii, ae le o le manumanu i le lalolagi nei, ma ona aafiaga o le siosiomaga ma suiga o le tau. O le faamafanafana lea a Peteru mo le au faatuatua, se'i toe faamanatu le faamaoni o valoaga ma poloaga a le Alii ua mae'a ona faailoa mai, e uiga i le aso o lona toe afio faalua mai.

Ia e le gata o le lalolagi nei ua le lelei, ae e le faapea ai ua gata ai iina le faamoemoe o le tagata faatuatua. O le mea ia manatua e le tagata faatuatua, o le Atua o loo pulea mea uma o le foafoaga, o le lalolagi nei e le o se tatou nofoaga tumau. E iai le aso e aveeseina ai le lalolagi nei, ae suia i le lagi fou ma le lalolagi fou i le lumana'i e pei ona molimau ai le Faaaliga 21:1 - "Ona a'u iloa lea o le lagi fou ma le lalolagi fou, aua ua mavae atu le ulua'i lagi, ma le ulua'i lalolagi, ua leai foi se toe sami." Ae peitai, tatou te le iloa poo afea tonu le aso e taunuu ai lenei faamoemoe mo le lumana'i, e pei ona fai mai Peteru. "Ae aua ne'i lilo ia te outou, le au pele, lenei mea e tasi, e tusa i luma o le Alii le aso e tasi ma tausaga e afe, o le afe foi o tausaga e tusa ma le aso e tasi. (2 Peteru 3:8).

## Manatu Faaiu

O le mea moni lava e tusa ai ma suesuega ma molimau, o loo aga'i pea i luma le faaleagaina o le siosiomaga ma suiga o le tau. O nei foi suiga o le tau e le mafai ona iloa i se taimi puupuu, se'i vagana ai ua mae'a se sefulu i le limasefulu tausaga, poo le mae'a foi o le selau tausaga ona faatoa iloa lea o ona aafiaga. E manatu faaau itulau e sosoo ai

---

# O le Pusa Penitala

*mai le itulau muamua*

la'u tautalaga e fai i le afiafi lava lea i se tasi o kolisi i lo matou nuu, ae te'i ua tatagi le telefoni. O se tina ou te le'i feiloa'i lava iai. Ua ta'u mai lona igoa, ma fai mai, o ia o le tina o se tamaitiiti e fitu tausaga. Ua telefoni mai ona ua lata ina oti i se ma'i. Fai mai ua talanoa ane lana foma'i, e le faigofie i lana tama ona malamalama pe a ia talanoa iai e uiga i lona oti ua lata mai. Ae o lona lava manatu, e pei lava e le sa'o lana foma'i.

Na fesili mai o ia i sa'u fautuaga ona o la'u galuega, o lo'u galue lea e fesoasoani i tamaiti faanoanoa ina ua maliliu o latou matua pe iai foi se isi faalavelave e mafua ai le faanoanoa o tamaiti. Na ou faaalua

iai o o tatou loto e tele ina malamalama lelei atu i mea faapea, i lo o tatou fai'ai (mafaufau). Ona ou fai lea iai, e te iloa lava e oe le mea e tatau ona fai mo lau tama. Na ou fai foi iai e sili ona alu atu e faalogologo i la'u tautalaga e fai i le po o le aso lava lea, ona ou te lauga e uiga i le mataupu, pe faapefea ona onosa'ia e tamaiti le faafeagai ai ma le oti o le tama po o le tina poo se isi foi o le aiga e alofa iai. Ona tali mai lea e alu atu.

Mulimuli ona ou toe manatua lea, pe mata ou te iloa le tina i totonu o le toatele o tagata o le a auai atu e faalogologo. Na tali e la'u tau fesilisili lea lo'u vaai atu o ta'ita'i mai e ni tagata se toalua se loomatua ma faanofo i lalo.

Na ou faaalua e faapea, e masani lava ona mate'ia e tamaiti le mea moni a o le'i ta'uina atu ia latou. Ma, e masani lava ona faatalitali tamaiti mo le taimi e ta'u atu ai e tagata matutua, ma latou talanoa faatasi iai. E tele lava foi ina malamalama tamaiti i le mea moni o le a tupu, le mea lea e tau nana e tagata matutua a ua iloa lelei lava e tamaiti. Ona ou talanoa lea i le tatau lava ona talanoa pea i tamaiti ae aua le faa'alo'aloa aua ua latou mate'ia lava e iai se mea o le a tupu.

E fai le matou malologa ae savali atu le tina matua i luma ua tu mai ai a o maligi ona loimata, ma fai mai, "Na ou iloa lelei lava o le mea lea e tatau ona fai, na ou iloa lelei lava e tatau ona ou ta'uina i la'u tama. O le a ou ta'uina iai i le po nanei."

O le taeao o le aso na sosoo ai na toe telefoni atu ai le tina lea, toetoe ina a le mafai ona talanoa atu i le tagi. Fai mai na alu atu ma fafagu lana tama ma fai iai, "Teleki, e iai le mea ou te fia talanoa ai ia oe." Ae oso mai Teleki, "Oi Mama, e uiga i lou oti?" "Ioe!" Ona fusifusi ai lea mo se taimi umi ma fetagisi. Ae fai ane Teleki, e iai sa na meaalofa mo lona tina ua leva ona ia teuina. I le pito i tua o se pusatoso o lana pusa, o loo iai se pusa penitala 'ele'elea. I totonu o le pusa o loo iai se tusi na ia tusia mo lona tina.

Ua leva ona faatalitali Teleki i le mea moni mai lona tina, a o lea ua faato'a ta'u ane. E te'a aso e lua, ae maliu le tina. E le'i tapunia lona pusa ma tuu ifo i lona tuugamau, ae avatu le pusa penitala 'ele'elea ua tuu iai i totonu, o loo iai i totonu o le pusa penitala le tusi o iai upu nei: "Tofa Mama, ou te alofa tele lava ia oe."

tusia e Doris Sanford,  
faamatalaina e  
Afemata T. Apelu Aiavao

---

## A'afiaga O Suiga o le Tau: O Valo'aga mai le Feagaiga Fou

lenei pepa, e le mafai lava e le tagata ona toe fo'ia le ogaoga o suiga o le tau o loo ua iai nei, pau le taumafaiga a le tagata i le taimi nei, ia faaitiitia kasa e mafua ai le vevela o le siosiomaga.

E le faapea la ua ta'u faatauvaaina ai taumafaiga a le lalolagi, e fo'ia ma faaitiitia le vevela ma suiga o le tau, ae o le manatu maualuga lava i lenei pepa, ia tumau pea lo tatou talitonuga, o le Atua na faia le lagi ma le lalolagi i le amataga, o ia foi e pule aoao i mea uma o le natura ma le foafoaga. E ui lava i taumafaiga a le tagata, ae ia faamati'eti'e pea le silisili Ese o le Atua, ua na o ia e mafaia ona fo'ia nei faafitauli.

O se taumafaiga vaivai foi a lenei pepa, o le vaai faa-mataupu silisili mai le Feagaiga Fou, ma ua aga'i lava i le toe tapu'eina o lo tatou

faatuatua, ona ua molimauina lava le faatupula'ia o aafiaga ogaoga ona o suiga o le tau. Ia tutupu mai nei aafiaga i le lumana'i, ae o loo mausali ma mau'a pea lo tatou faatuatua, o le Atua e auai (omnipresent God) i soo se mea, o le Atua e malosi (omnipotent God), na te mafaia soo se mea; o le Atua foi e silafia (omniscient God) mea uma o le siosiomaga ma le foafoaga. E leai foi se malosi o le tagata na te tetee atu ai i aafiaga o suiga o le tau pe a tutupu mai. Pau lava le matafaioi a le tagata, ia tumau lona faatuatua i le Atua, e pei ona faamalosi mai le fai salamo, "O le mea lea tatou te le fefefe ai, pe a faaliliuina le lalolagi, ma luluina mauga i totonu o le sami, pe a taalili ma sousou le suasami, ma faagateteina ai mauga i lona maualuga." (Salamo 46:2-3)

---

O le Mafuaaga o le Pese:

# Great Is Thy Faithfulness

“O mea lelei uma e foaifuaina mai, atoa ma meaalofoa uma e atoatoa ona lelei, mai luga lava ia, e alu ifo mai le Tama o malamalama, e le o ia te ia se mea faaletumau, poo sina liliu itiiti.” - Iakopo 1:17.

O pese ma viiga uma na tusia i tausaga ia e le o mamao atu, i luga o le mataupu e uiga i le lelei ma le faamaoni o le Atua, e tu ese ai lava le viiga lenei: “Great Is Thy Faithfulness”, e pei o se moli o le ava e faatonutonu ma le saogalemu le ofi mai o vaa i le taulaga.

O le tele lava o viiga, e tusi mai e tagata e faavae i luga o ni mea mata'utia ma le ogaoga na tutupu i o latou olaga, ona latou faamatalaina lea i pese. Ao le viiga lenei, na tusia mai i le talitonuga o le na ia tusia, i le faamaoni pea lava pea o le Atua e faaalua pea i lea taeao ma lea taeao ma lea taeao.

Na fanau Thomas Obadiah Chisholm i se tama'i fale faatauavaa lava i Franklin, Kentucky, i le aso 29 o Iulai 1866. E ui lava e le'i a'oga i se a'oga mauuluga, ae na amata lona olaga faiaoga ina ua faato'a 16 ona tausaga i se a'oga tulagalua sa a'oga ai a o laitiiti. Ina ua 21 ona tausaga, ona avea lea o ia o le sui faatonu o se nusipepa i lona nuu, o le “The Franklin Favourite”. E ono tausaga talu mai le taimi lea ae ia talia Keriso e fai ma ona Faaola i se sauniga sa lauga ai le faifeau o Dr.H.C.Morrison. Mulimuli ane ona faauuina lea o ia e fai ma faifeau Metotisi. Peitai e le'i umi ae faamavae ona ua le atoatoa lona malosia mo le galuega.

O se vai taimi ina ua te'a le tausaga e 1909 na galue ai i se galuega inisiua. Na ritaea mai o ia mai lea galuega i le tausaga e 1953, ma nofo ai i se nofoaga mo tagata matutua, Methodist Home for the Aged, i New Jersey.

Na ia tusia ni solo se 1200, ma e tele nusipepa sa lomua ai ia solo. O nisi foi o nei solo, na faafatiina ma avea ma nisi o pese aupito sili

ona moomia e le au Kerisiano.

O se tusi na ia tusia i le tausaga e 1941 na ia faapea ai, “E le tele lava ni a'u tupe na maua ona o le le atoatoa o le malosia, ma o loo tumau pea lo'u maua i ma'i. Ae peitai e le tatau ia te au ona ou faagaloina le faamaoni o le Atua tausi feagaiga, ma ua tele mea ua ia faia mo a'u ua faaali ai lona tausia o au, ma ua faatumuina ai pea a'u i le agaga faafetai.”

O le tausaga e 1923 na ia auina ai nisi o ana solo i le faifeau o Rev. W.M. Runyan, o se fai musika i le Moody Bible Institute ma o le faatonu o le Hope Publishing

Company. O ia lea na ia tusia se faamaumauga e faapea:

*O le solo lenei: Great Is Thy Faithfulness, e logoitino lona uiga ma e ou te tatalo ma le naunauta'i, ina ia fesoasoni la'u fati i lona faaaogaina, ma o le tala faasolopito o lea pese ua faalia ai le tali mai o le Atua i tatalo na fai.*

O lenei pese o se pese sa matua mana'omia ma fiafia iai tamaiti aoga o le Moody Bible Institute. Na vave lava ona sosolo atu le lauiloa o lenei pese i galuega faa-Evagelia i le lalolagi atoa. Fai mai le tagata pese lauiloa o Bev Shea, na faato'a oo atu le pese lenei i aulotu i Peretania i le tausaga e 1954 i talaiga faa-Evagelia sa ta'ua o Billy Graham Crusades, ma lauiloa ai i lea atunuu.

O Thomas Chisholm o ia foi lea na ia tusia le pese: “Living for Christ”.

---

## Great Is Thy Faithfulness

Great is Thy faithfulness, O God my Father! There is no shadow of turning with Thee; Thou changest not, Thy compassion, they fail not; As Thou has been Thou forever wilt be.

Summer and winter, and spring time and harvest, Sun, moon and stars in their courses above, Join with all nature in manifold witness To Thy great faithfulness, mercy and love.

Pardon for sin and a peace that endureth, Thine own dear presence to cheer and to guide, Strength for today and bright hope for tomorrow - Blessings all mine, with ten thousand beside!

Chorus:

Great is Thy faithfulness! Great is Thy faithfulness! Morning by morning new mercies I see; All I have needed Thy hand hath provided - Great is Thy faithfulness, Lord unto me!

---

## O apitaga i le Tusi Paia

E tele ituaiga fale eseese o loo taua i le Tusi Paia sa nonofo ai tagata i na ona po. O anapapa isi mea sa faaoga. O fale'ie isi sa matua taatele. O Aperaaamo ma Isaako ma Iakopo ma a latou fanau, faapea ma le nuu o Isaraelu, o ni

tagata sa mau i fale'ie. A o fale i Sasa'e Latalata (Near East), sa faia i piliki ma maa ma laau, ma si'osi'oina ai se vaega faatafafa. O fale ia sa mafolafola le vaega i luga sa faaaogaina i ni mafutaga pe faasavili ai foi i le tauafiafi.

A o le Salamo e 23:6 o loo faaalua ai moomooga o tagata o le Atua e faapea: “ou te nofo foi i le fale o le Alii i aso e tele lava.”

---

# O E UA MALILIU

**Sila Matamea  
Vainalepa Esekielu  
Mokeni Esekielu  
7 Mati 1960-26 Aperila 2015**

O le A'oa'o Fesoasoani faavae o le aulotu Ekalesia Faapotopotoga Kerisiano Samoa i Greenlane, Pulega i Maungakiekie, Matagaluega Aukilani i Niu Sila.

Na fanau Esekielu i le aso 7 Mati 1960 ae maliu nei i le aso 26 o Aperila 2015 i lona 55 o ona tausaga. O ona matua o Mokeni Esekielu le tama mai Fasitootai, a o Mafai Matamea mai Auala le tina. E lima tausaga talu ona ou galue i Fasitootai, ae malaga mai loa Esekielu i Niu Sila nei ae faatoa 22 ona tausaga. Na ma toe feiloai ma Esekielu ina ua tuanai le sefulu ma ona tupu tausaga ina ua ou galue i Takanini ma toe faamumu atili ai le ola auaua ma le tautua lotu o lenei tama.

E le tau faafulua i ni upu le ola o le tagata galue. O ona matai e amata mai ai. O lona suafa muamua o le matai o le aiga o lona tama; o lona lua o le matai mai le aiga o lona tina; ma lona tolu o le suafa mai le aiga o lona faletua poo le tausī. O le tafatolu lena o matai sa na tauaveina a o iai i le ola nei.

I le galuega foi a le Ekalesia, o ia o se tasi o maa faavae ola i le amataga o le aulotu i Greenlane i lona amataga mai i le tauafiafi o le mileniuma ua tuanai atu. Na faatuina le EFKS i Greenlane ia Novema o le 1999. O i latou nei na amatamea ma faavae le galuega i le gasu o le taeao. I le aulotu foi, na amata lava i lona faamaopoooina o le Au Talavou, sosoo atu ai ma le aveva ma Taitai Pese o le Aufai Pese. I suiga o tofi o le aulotu na filifilia ai e aveva ma Teutupe lona lua a le Ekalesia. Na

umi se taimi o ona tauaveina le tofi Teutupe, seia oo ina filifilia o ia i le tofi Failautusi seia oo i lona maliu. O lana auauanga lena i le itu faaletino o le galuega. A o lona soifuaga foi faale-aufaigaluega a le Atua, na oo foi lana auauanga i tofi uma. Ina ua uma ona faaipoipoina, ona filifilia ai lea e aveva ma tiakono. Na sosoo lena ma le tuuina atu o lona suafa e su'e ai faaa'oa'o fesoasoani ma e na faamanuiaina. O lona uiga na oo uma lava lana auauanga i tafa eseese uma o le galuega a le Atua i Greenlane, ma o ia foi o le uluai a'oa'o fesoasoani o le aulotu.

O lona iai i Niu Sila nei e ui ina le nofomau i nei tausaga e tele i lona taimi, ae ma'eu lona sogasoga aua e lei faalagolago i se isi i le atinaeina o lona aiga. Sa fai lana flea-market e faatau ai fualaa ma mea eseese ma le tele o isi auala na ave iai e le Atua e tausī ai ona matua, o lona aiga ma tautua ai i le lotu. E moni lava a le aposetolo o Paulo - 'E galue foi le Alii i mea uma lava mo le lelei o le tagata e alofa ia te ia.' Na oo lava ina faatau lona uluai fale totino. E alu nei le alii, a ua tuua i mau si ona toalua le tina ia Lea ma si ana fanau o o la aiga, aemaise le tu maualuga o lona auauanga ma le tautua matavela i le galuega paia a le Atua.

E le tau teuina i ni upu tala o tagata tautua saafia faapei o Esekielu. Fai mai Lapana i le auauanga a Aperamo o Ekisala, "Maliu maia o oe ua faamanuia e le Alii, se a le mea ua e tu ai i fafo? Aua ua uma ona teuteua o le fale. Ona ulufale lea o le tagata i le fale."

Ou te manatu o le saunoaga foi lea a Iesu i lenei auauanga. Se a le mea e te tu ai i fafo? Maliu maia, e te le toe timu'ia, e te le toe laina, ulufale maia, ulufale mai i le fiafia o lou Alii. Le tioa foi a saafi le fai Salamo ma fai mai, "E silisili i le

manatu o le Alii le oti o ona tagata amio-Atua." Salamo 116:15. Ma o le matua lena o la'u molimau. E le sili, ae silisili ma saga sili i le finagalo pa'ia o le Alii, le oti o ona tagata amio-Atua.

O lona falelauasiga, o se sauniga na faatumuina i le silisiliese "o le mamalu ma le paia o le Atua. Sa taitai le sauniga e le Tama/Toeaina o le Pulega Pouniu Faamausili FT, ma le aufaigauaga faifeau o le Pulega. O paolo ma gafa o uo ma aumeamamae, ma Samoa potopoto ma lana aulotu i Greenlane. O au sa taitaina lona sauniga faamavae i lona oliolisaga tumau i le fanua maliu i Papatoetoe, Manukau.

Fai mai Iesu, 'Amuia ia auauanga e maua i latou e lo latou Alii, o mataala pe a sau. E moni, ou te fai atu ia te outou, e fusi e ia ona ofu, ma fai atu ia te i latou ia taoto e aai, ma alu ane lava, ma auauanga ia te i latou. O le tali lena o lou afu liligi ma lou tautiga. E le to eleele pe leiloa lou maau ma lou gapatia, lou no'ono'oia ma lou fatuatia. E leai, e puna uma i luma o le nofoalii o le Atua e oo i sina ipuvai e te saafua i le igoa o le soo, o Keriso lava lea ua e fai iai. E 'a'apa mai ona 'a'ao alofa ma se'i mai oe mai tuā ma tuu i lumā. Na te ava'e oe mai lalō ma faati'eti'e i lugā. Aua soo se tasi na te faia se mea lelei e toe maua e ia mai le Alii.

Ua ou fia tusia iinei le solo o aualofoaga (Requiem) a Tusitala mai Sikotilani o loo taoto i le mauga o Vaea i Samoa, ou te aualofoa ai ia te ia.

*Foa le tuugamau ou te taoto ai, i lalo ifo o le lagi apelepelea e fetu. E malie le olaga ae tuua ma le malie.*

*faaauau itulau e 16*

---

# O E UA MALILIU

**Aiono  
Suamamataia  
Dr.Fanaafi o  
Faamalama o  
Tapuaiga a  
Sapapalii  
Le Tagaloa**

**25 Iuni 1933-6 Aokuso 2014**

Susuga Aiono Suamamataia Dr Fanaafi o Faamalama o Tapuaiga a Sapapalii Le Tagaloa.

Na soifua mai i le aso 25 Iuni 1933 i Mataniu Feagai ma le Ata, Sapapalii. Na faamanavaina e le Atua ana feau i le aso 6 Aokuso 2014. O ona matua o Aiono Ma'ia'i ma Aimiti Faafili Fiamē.

Na faae'e iai le suafa Aiono Suamamataia i Pouniu i Fasitoota i le aso 22 Novema 1973. ma e iai le talitonuga o le vaitau lea sa faia ai ona tofi tiakono sa auauna ma tautua ai i le galuega a le Atua.

E to'aga ma faamaoni i tapuaiga i Aso Sa uma, ma soo se fuafuaga fai a le Ekalesia. E le tau faamatalaina ona uiga tamalii ma le tauagafau, e faapea foi lana auauna ai i le Atua. E le leoa, e le gaioia, e tautua filemu ma le loto maulalo. Ai lava ua fetau ia te ia le upu a le atunuu: 'E iloa lava le tamalii i aga faatamalii', ua o faatasi ma lona faamemelo i le tu ma aganuu a Samoa.

Salamo 1: Amuia le tagata e le savali i le filifiliga a e

amioleaga.....O ia foi e faapei o le laau ua toto i tafatafa ane o vaitafe.....E faapea le Susuga Aiono. O se laau e mauaa, e ola lauusi, poo le a le fesuia'iga o le tau i afa ma matagi malolosi, e le maluelue, e tumau pea, e le suia e mausali lava.

Ua iloa o ia e le lalolagi i lona potu ma lona atamai. Sa aoaoina i atunuu mamao ae tumau lava o ia i lana tu ma lana aganuu, aemaise o lona talitonuga na tupu a'e ma ia o le EFKS.

O se tina e fai taulaga - e le'i oo i masina o faiga taulaga ae ua leva ona lafolafola ana taulaga. O nisi o ana foa'i mo le malumalu, sa ia saunia se tasi o faamalama tele o le falesa. E faapea foi laau ua mamauina mo papatisoga ma le faalauiloina o viiga o le Atua.

O se tasi o ana aga masani, e le mafai ona ia tuua le malumalu, ae le'i feiloa'i mai ma matou faatofa. O taimi ia e aumai ai lana faafetai e tusa ai ma le sauniga aemaise ana fautuaga. E faasoa mai ai foi i ni ona faafitauli.

O ia sa avea ma sa'o o lo latou aiga i Pouniu. E oo mai iai le valaau a le Atua e le'i misi lava le lotu tausī a lenei aiga. E le o po malae i le tulaga ese o ana taumafaiga, na ia tuu maua ai Samoa, ona o ia o le uluai tamaitai o le Pasefika na ia mauaina le faailoga o le Doctor of Philosophy i le University of London i le tausaga e 1960. O le tausaga e 2010 na faamanatuina ai le 50 tausaga o

lona faailoga. Sa ia taumafai e faatuina le Iunivesite, ae le'i umi ae faavaeina le Iunivesite o Samoa (NUS). O lea na faavaeina ai le Iunivesite o Savavau.

Sa avea ma Faatonu Sili o A'oga; sa avea foi ma sui faipule o le palemene. O lona 80 tausaga na malaga ai i Isaraelu. Sa ia lafoina mai ai ata o le Nuū Paia mo ma'ua. E tele lona silafia i tala faasolopito i atunuu, aemaise le Ekalesia.

Atonu o nisi ia tala ua mafai ona saunia mo le Susuga Aiono Fanaafi, ou te talitonu o i latou na iloga o latou tofi ma tulaga ese lo latou tulai mai i le soifuaga nei, e le tau molimauina.

Faafetai i le Atua mo Aiono Fanaafi, o lana meaalofo mo le nuu, le Ekalesia, faapea le atunuu. O ia lava o le lupe na fa'ia mai le fuifui, sa faalele aua le Aiga Satuala, Aiono ma Leaupepe, Sua Toleafoa ma le Taauso faapea le Igoa Matua ia Tauavea, ua fo'i atu i aao o le Atua.

E! ua maliliu toa, ua maumau ai au'upega o le taua.

O ona toe sauniga sa faia i le aso 14 Aokuso. Sa auai le Afioga i le Sui Ao ma le Masiofo, le Afioga i le Palemia ma le Kapeneta faapea le Palemene, o malo mai fafo, le aufaigaluega paia a le Atua.

O nisi o ona molimau sa saunia e le Taitaifono o le Ekalesia, Susuga Tautiaga Senara, Susuga i le Toeaina Faatonu Eti Tamati, Susuga i le

*faaauau itulau e sosoo*

# ATA O E UA MALILIU



**Aiono Suamamataia  
Dr. Fanaafi o  
Faamalama o Tapuaiga  
a Sapapalii Le Tagaloa**

*faaaauau mai le itulau e 15*

Taitaifono Ekalesia Soofaatasi Kasiano Leaupepe, Susuga i le Toeaina Penisione Apelu Lelevaga, faapea le Afioga i le Palemia. O au sa taitai i ona sauniga uma, ma matou faamavae atu ia te ia i lona oliolisaga tumau i lona maota i Pouniu.

Rev. Uta Muaulu FS,  
Fasitoouta.



**Loimata o Apa'ula Lepua  
8 Fepuari 1920-9 Iuni 2015**

*faaaauau mai le itulau e 14*

O le tina matua ia Loimata o Apa'ula. Aso Soifua 8 Fepuari 1920. Malii vaveao o le Aso Lua 9 Iuni 2015 i le te'a o le 4 i le vaveao O se tina sa tautua ma galue i le galuega a le Atua i le EFKS i Eva. Molimauiina foi e le fanau o se tina tausii faifeau. E malii le tina ua 95 ona tausaga.

O toe sauniga o le tina. Aumaia i tua mai le Fana'ega o Sefo Pa'u i le aso 16 Iuni 2015. Aumai i le falesa mo lona sauniga ona sosoo ai lea ma le family service. Mapu atu i le fale mo leoleoga o le po..

*and I laid me down with a will.*

*This be the verse you grave for me, here he lies where he longed to be. Home is the sailor and home from sea, and the hunter home from the hill.*

Na matou pepese ma faatofa atu ia te ia i le pese a le Au Kerisiano - Talofa uso e, tofaina oe.... e ala oe pe a mavae le po. Tofa! Tofa!

**T. Misikopa Loli,  
EFKS Greenlane.**

O le 10am Aso Lulu o ona toe sauniga.

O le faifeau Nofu Aiga ia Sealii Faigaa na faaulufaleina i totonu lona sa mo ona toe sauniga. O le A'oa'o ia Posea sa faitauina le Tusi Paia. O le Susuga ia Faatafa (Faifeau Aso Fitu) sa saunia tatalo. O a'u, Irenio Tagaloa sa lauga. Maea le sauniga ona momoli atu ai lea i lona oliolisaga tumau mo ona sauniga faaii. O au lava sa ta'ita'i. Ia manuia tele lau malaga tina.

Irenio Feata Tagaloa FS,  
EFKS Eva.



**Sila Matamea Esekielu  
Mokeni Esekielu**

## O Vaitafe Taua o le Tusi Paia

**Taikerise:** lea e tu ai le aai o Nineva, le laumua o Asuria i ona po anamua, o se vaega o **Irak** i ona po nei.

**Euferate:** e tafe atu i totonu o le Faato'aga i Etena ma le aai o Papelonia, o se vaega foi o **Irak**.

**Naila:** lea na faatafeafea ai le 'ato o iai i totonu le tamameamea o Mose ma le faamoemoe ia laveaiina o ia e se isi mai sauaga a Farao.

**Ioritana:** le vaitafe na sopo'ia e le nuu o le Atua ma taunuu atu ai i le nuu na folafolaina.

## Sila Matamea Vainalepa Esekielu Mokeni Esekielu

*mai le itulau e 14*

*A o mavaega e fia lavasia, e fai ma fatu o aualofoaga. Ua lalago ia i fanua sa fananau iai, ua ae tautai sa tiu mai vasa, nape foi i fale na, tuliga i tuasivi.*

*Under the wide and starry sky,  
dig the grave and let me lie.  
Glad did I live and gladly die,*